

## Aüd Ngim Peba Mórrag Zon Ne Kla Wialómórr Ngaensingül Bóktan

Ini Zonón aüd ngim wialómórrón peba mórraga. Wa darrü sos singül kwata zaget pamdó wialómórr, oya ngi Gayus. Wa Gayusün agürda zitülkus oya tangbamtinanme ngibürr Yesun ngidü zonaretaldó. Akó darrü pam, ngi Diotrepes, oya ne kolae tonarr kwarilürr, wekwata umul-umulan ngitanda.

### **Ini Peba Mórragan Bóktan Zono Módógako:**

- A. Ini peba mórragan tapaku bóktan 1-4
- B. Yesun ngidü agóltagól zonaretal morroal ngabkan 5-12
- C. Dómdóm alakón bóktan 13-15

### *Ini Peba Mórragan Tapaku Bóktan*

<sup>1</sup> Ka Alngomól Byarrmarr Pamla, ini peba mórrag kótó wialómdóla, kürü moboküp gódamdó Gayus, kürü amkoman [moboküpdü ubi] noankama.

<sup>2</sup> Kürü moboküpdü gódam, kürü ubi ma azid-kokezan nyabendóla, akó marü blaman nyabena küppükü ki bainünüm, wata marü samuazan morroal nyabenda Godón ubi ngark-watódó. <sup>3</sup> Zitülkus módóga, ka karibóka-koke bagür namülnürrü ngibürr Yesun ngidü zonaretala nóma togobórr da kibü tüzazilóp

wagó, ma Godón amkoman bóktan ngarkwatódó ngyabendóla. Ene amkoman ka umulürrünla, ma Godón amkoman bóktan metat mamandóla. <sup>4</sup> Kürü darrü klama koke bagürwóman ngitanda igó poko arrkrudügabi wagó, kürü olmalzan nidipako darpan amkoman bangundü, Godón amkoman bóktan mamandako.

*Yesun Ngidü Agóltagól [Zonaretal] Morroal Ngabkan*

<sup>5</sup> Kürü moboküp gódam, ma Yesun ngidü zonaretal nidi agóltagóldako tangbamtindóla, enana ngibürr mogobako marüka. We ngarkwatódó, ma moba amkoman bangun okaka amzazildóla Yesuka. <sup>6</sup> I sos pamkolpam marü moboküpdü ubiankwata kuri nüzazirre. Ene morroala ma sab ibü morroal tangnólenónómke olgabi zirrbapónóm, Godón ubi ngarkwatódó. <sup>7</sup> Zitülkus módóga, izan agóltagól kwarilürr Yesun zaget tónggapónóm, darrü tangbólean koke ipüdóp Yesun amkoman angun-koke kolpamdógab. <sup>8</sup> We ngarkwatódó, mi inzan pam mibiób müótüdü urrbulo, igósüm mi tang dabyóndakla Godón amkoman bóktan ayom.

<sup>9</sup> Ka wa sosdó wialómórró, a Diotrrepes, ngi pamóm nóto ubi bainüm kainda, kürü bóktan bidóbidó bangónda. <sup>10</sup> Da ka ne nóma tamo, ka sab wirri kwitüm bóktalo sosdó wa ne kolaeen tórrmen tólbaelda, ngi bumarru kürükwata. Ene klamdó ta gaodó kokea, wagó wa bangónda Yesun ngidü zonaretal morroal azebóm. Wa akó piküp baina nidi ubi baidako ene zonaretal ok bain-gum, akó ibü bagda sosdógab.

<sup>11</sup> Kürü moboküp gódam, ma wirri kolae tonarrdógab tikó apadgu, a ma wa morroal tonarrdógab tikó ipa. Nadü oloma morroal tonarr tómbapónða, wa Godón olome. Nadü oloma wirri kolae tonarr tómbapónða, wa Godónbóka umul-kóka.

<sup>12</sup> Dimetrriusün\* müótüdü ingri. Blaman kolpama oya morroal tonarrbóka apóndako. Akó oya tórrmen tulmil ta Godón amkoman bóktan ngarkwatódómako, ki igósidi umulakla wa morroal oloma. Ka ta oya morroal tonarrbóka inzan apóndóla, akó ma umulóla, ka ne poko bóktandóla ngibürr kolpambóka amkomana.

### *Dómdóm Alakón Bóktan*

<sup>13</sup> Kürü wa ne dokyanan bóktanako marüka wibalómóm, da ka ma kokela peba mórragdo wibalómóm. <sup>14</sup> Ka [gedlóngóm bairdóla] marü büsai asenóm, da mi nizana sab darrpan pokodó ola ikik apóni.

<sup>15</sup> Moboküpdü paud asi ki yarilün marüka.

Ala marü ne gómdamalko, tibiób morroal yawal bóktan zirnapórre marüka. Kürü morroal yawal bóktan nókyenónómke darrpan-darrpan ola mibü nadü gómdamalasko.

---

\* **1:12** Dimetrrius ini peba mórrag wató sidódürr Gayuska.

**Godón Buk**  
**Portions of the Holy Bible in the Gizrra language of**  
**Western Province, Papua New Guinea**  
**Buk Baibel long tokples Gizrra long Niugini**

copyright © 2019 Wycliffe Bible Translators, Inc.

Language: Gizrra

Translation by: Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-02-22

---

PDF generated using Haiola and XeLaTeX on 4 Mar 2023 from source files dated 22 Feb 2023

d83b2e14-c797-5499-b582-de63912ac614